



Fidoyilik —
Vatanga xizmat demak!

2024-yil 16-aprel, seshanba,
45 (23.922)-son

**KUN
HIKMATI**

Ziyoratgohni
obod etish
ko'ngilga taskin
beradi

Zarafshon

1913-yil aprel oyidan chiqa boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz



Madaniyat va san'at xodimlari taqdirlandi

Viloyat musiqali drama teatrida 15 aprel - Madaniyat va san'at xodimlari kuni munosabati bilan tadbir tashkil etildi.

Tadbirida viloyat hokimining o'rinbosari R.Qobilov ishtirok etib, soha xodimlarini kasb bayrami bilan tabrikhladi, faol ijodkorlarga viloyat hokimligining tashakkurnomasi va esdalik sovg'alari topshirildi.

- 40 yildan buyon teatr va san'at sohasida ishlayman, - deydi Samarqand shahar madaniyat bo'limi boshlig'i Rita Mahmudova. - Keyingi yillar-

da sohaga e'tibor oshdi. Jumladan, madaniyat va san'at markazlarining moddiy-texnik bazasi yaxshilandi, ijodkorlarni qo'llab-quvvatlash maqsadida 20 ga yaqin loyiha amalga oshirildi. Madaniyat va san'at xodimlari kuni belgilandi. Bugun kasb bayramida ko'p yillik mehnatlarim e'tirof etilib, Madaniyat va san'at fidokori ko'krak nishoni bilan taqdirlanganimdan xursandman.

Tadbir davomida «Lazgi» ashula va raqs ansambli jamoasining konsert dasturi namoyish etildi.

F.RO'ZIBOYEV.

Finlandiyalik talabalar Samarqandda

Finlandiyaning o'n ikkita oliy ta'lim muassasasidan 20 dan ziyod professor-o'qituvchi va talabalar O'zbekiston - Finlandiya pedagogika instituti faoliyati bilan tanishish, hamkorlikni kengaytirish maqsadida Samarqandga keldi.

Tashrif doirasida O'zbekiston-Finlandiya pedagogika instituti rektori Shahzoda Negmatova mehmonlar bilan uchrashuv o'tkazdi. Hamkorlikda tashkil etilishi kutilayotgan «Fin tilini o'qitish markazi» da finlandiyalik professor-o'qituvchilar, ayniqsa, talabalarining ishtiroki muhim ekani ta'kidlandi. Uchrashuvda Finlandiyaning ta'limdagi yutuqlari bosqichma-bosqich institutda ham tatbiq etilayotgani



to'g'risida ma'lumotlar berildi. O'zaro muloqot davomida kelgusida amalga oshirish mumkin bo'lgan loyihalarni muhokama qilindi.

- Samarqand shahri menda ajoyib taassurot qoldirdi, - dedi Helsinki universiteti professori, delegatsiya rahbari Sirke Makinen. - Ushbu ko'ha maskanda mamlakatimiz bilan birgalikda ochilgan pedagogika instituti faoliyatini o'rgandik. Institut rahbari bilan ko'p masalalar yuzasidan fikr almashdik. O'ylaymanki, ta'limdagi bu hamkorligimiz tez orada o'z samarasini beradi.

Yurtimizda o'tkazilayotgan «Yashil makon» umummilliy loyihasi doirasida «O'zbekiston-Finlandiya bog'i»ning ilk nihollari finlandiyalik yoshlar bilan birgalikda ekildi.

- Registon maydonini ko'rish orzuim edi, bugun u amalga oshdi, - deydi Helsinki universiteti talabasi Rauhama Regina. - O'zbekistonning chiroyli tabiati, buyuk tarixi meni hayratlantirdi. Institutda yangi tashkil etilgan «Fin tilini o'qitish markazi»da bo'ldik. Biz kursdoshlarimiz bilan mazkur loyihaga yordam berishga tayyormiz.

Hamza BURXONOV.

Samarqandni ziyorat qilish — sharaf

O'mon Sultonligi tashqi ishlar vaziri Badr bin Hamad al-Busaydiy boshchiligidagi delegatsiya 14-aprel kuni Samarqandda bo'ldi.

Mehmonlarni Samarqand xalqaro aeroportida viloyat hokimi Erkinjon Turdimov va boshqa rasmiylar kutib oldi.

O'mon Sultonligi tashqi ishlar vaziri dastlab buyuk muhaddis Imom Buxoriy majmuasini ziyorat qildi. Ayni paytda bu yerda amalga oshirilayotgan ulkan bunyodkorlik ishlariga yuksak baho berdi.

Mehmonlar Imom Buxoriy xalqaro ilmiy-tadqiqot markazi faoliyati bilan tanishdi. Markazda buyuk muhaddis va allomalar merosini o'rganish bo'yicha olib borilayotgan ilmiy-tadqiqot ishlari to'g'risida ma'lumot berildi.

- Samarqandga ilk tashrifimiz taassurotlarga boy bo'ldi, - dedi O'mon Sultonligi tashqi ishlar vaziri Badr bin Hamad al-Busaydiy. - Ayniqsa, ulug' muhaddis Imom



Buxoriy qabrini ziyorat qilish biz uchun ulkan sharaf. Ushbu majmua yaqinda Islom olamining eng qutlug' ziyoratgohlaridan biriga aylanishi shubhasiz. Delegatsiya a'zolari Registon may-

donidagi ulug'vor madrasalar, bu yerda namoyish etilgan milliy hunarmandlik mahsulotlari va xattotlik san'ati namunalari katta qiziqish bilan tomosha qildi. **Baxtiyor MUSTANOV.**

Oqdaryoda tomorqachilikda nima o'zgarish bo'ladi,

tuman tibbiyotida — chi?

Oqdaryo tumanida aholi tomorqalaridan samarali foydalanish maqsadida ijobiy ishlar amalga oshirilmoqda. Jumladan, tumandagi 35 ta mahallaning har biridan 7 tadan, jami 245 ta xonadon ajratib olingan bo'lib, ularda parrandachilik, is-siqxona, sabzavotchilik, hunarmandchilik hamda qo'y va qoramol boqish yo'lga qo'yilgan. Shuningdek, har bir mahallaga lider tadbirkorlar birlashtirilgan bo'lib, tomorqalarda kartoshka, loviya, pomidor, bulg'or qalampiri, bodring kabi sabzavot ekinlari parvarishlanmoqda.

Tuman hokimi Sh.Qudratov jurnalistlarga tomorqalarda ekin ekish, daraxt ko'chatlari o'tqazish va obodonlashtirish borasidagi ishlar haqida ma'lumot berdi.

- Mahallalarda tashkil etilgan yettilik tavsiyasi asosida ijtimoiy daftarlarda ro'yxatda turgan 910 nafar yosh tanlab olindi, - deydi tuman hokimi Sherzod Qudratov. - Ularga 610 gektar yer maydoni ajratildi. Hozirgacha 417 nafar yoshga 256 gektar yer berildi. Shuningdek, mazkur yer maydonlarida 7 ta nasos o'rnatilib, suv bilan to'liq ta'minlanadi.

Undan tashqari, «Bir mahalla - bir mahsulot» tamoyili asosida 3 ta eksportyor belgilangan. Jumladan, Primkent mahallasi xonadonlarida 123 gektar yer maydonida kartoshka, loviya va

tomorqalarda ekin ekish rejalashtirilgan. Mahallaga birlashtirilgan «Usman afroil» MChJ aholini urug' va ko'chat bilan ta'minlaydi. Shuningdek, mazkur korxonaga 12 ta mahalladan 280 nafar ishsiz yoshlar birlashtirilgan bo'lib, ularga 757,6 gektar yer ajratib berilgan.

Tumandagi Zarafshon, Yangiobod va Oyatmag'ali mahallalariga «Yangiravot shabnam» MChJ birlashtirilgan bo'lib, mahalladagi 1715 ta xonadon tomorqasida 4 million 480 ming dona pomidor ko'chati ekildi. Mahsulot yetilguniga qadar ekin parvarishi korxonaga agronomi nazoratida bo'ladi. Tomorqalarda yetishtirilgan pomidor bozor narxida sotib olinadi.

Shuningdek, jurnalistlar tuman tibbiyot birlashtirishida bo'lib, shoshilinch tibbiy yordam, kattalar va

bolalar bo'limlaridagi qurilish-ta'mirlash ishlari bilan tanishdilar.

- O'tgan yili bo'limimiz yangi binoga ko'chib o'tdi, - deydi shoshilinch tibbiy yordam bo'limi mudiri Doniyor Qurbonov. - Investitsiya mablag'lari hisobidan o'rnatilgan zamonaviy tibbiy uskunalar yordamida bemorlarga shu yerning o'zida aniq tashxis qo'yilmoqda.

Yangi binoda joylashgan 295 o'rinni jarrohlik, tug'ruq, terapiya va bolalar bo'limlariga eng so'nggi rusumdagi 13 ta raqamli asbob-uskuna keltirib o'rnatilgan.

- Joriy yilda 46 mingdan ziyod 40 yoshdan oshgan hamyurtlarimizni skrining, qariyb 20 ming nafar ayollarni onkologik tekshiruvdan o'tkazishni rejalashtirganimiz, - deydi tuman tibbiyot birlashtirish bosh vrachi o'rinbosari Azimjon Qilichev. - Shuningdek, 96 nafar bemorda yuqori texnologik jarrohlik amaliyoti o'tkazamiz. Buning uchun laparoskop, lor-kombayn kabi o'ta noyob asbob-uskunalar ega bo'ldik. Ikki nafar vrachimiz va uskunalardan foydalanish bo'yicha malaka oshirib keldi. Endilikda shu yerning o'zida o'ta qiyin operatsiyalarni ham o'tkaza olamiz.

D.O.TAMURODOV.

Prezidentimiz Shavkat Mirziyoyev muborak Ramazon hayiti arafasida xalqimizga xos ezigulik, bag'rikenlik, insonparvarlik, mehr-oqibat va kechirimli bo'lish kabi olijanob fazilatlarining yorqin ifodasi sifatida «Jazo muddatini o'tayotgan, qilmishiga chin ko'ngildan pushaymon bo'lgan va tuzalish yo'lga qat'iy o'tgan bir guruh shaxslarni afv etish to'g'risida»gi farmonni imzoladi.

49 nafar samarqandlik afv etildi

Farmonga muvofiq, O'zbekiston Respublikasi Konstitutsiyasining 109-moddasi 23-bandiga asosan jazo muddatini o'tayotgan hamda qilmishiga chin ko'ngildan pushaymon bo'lgan va tuzalish yo'lga qat'iy o'tgan 426 nafar shaxs afv etildi.

XO'SH, ULARNING QANCHASI SAMARQANDLIK?

Viloyat ichki ishlar boshqarmasi probatsiya xizmatidan olingan ma'lumotga ko'ra, mazkur hujjat bilan 47 nafar samarqandlik afv etilgan. Ulardan 45 nafari jazoni ijro etish va manzil-koloniyalardan shartli ozod qilingan. 2 nafar sobiq mahkumning jazosi axloq tuzatish ishiga almashtirilgan.

Tahlillarga ko'ra, afv etilganlarning 36 nafari Jinoyat kodeksi 273-moddasining turli sanksiyalari bilan bog'liq jinoyatlarda aybli, deb topilgan. Ya'ni, giyohvandlik vositalari, ularning analoglari yoki psixotrop moddalarni o'tkazish maqsadini ko'zlab qonunga xilof ravishda tayyorlash, olish, saqlash va boshqa harakatlar qilish, shuningdek, ularni qonunga xilof ravishda o'tkazishda «qo'li» bo'lgan.

Afv etilganlarning 6 nafari ayollar tashkil etadi.

Ular asosan Jinoyat kodeksining 135-moddasi (2 nafari giyohvandlik vositalari) - odam savdosi bilan bog'liq jinoyati uchun jazolangan. Mazkur xotin-qizlar orasida hali 20 yoshga ham kirganlari ham borligi ularga hayotda to'g'ri yo'lni topib olishlari uchun katta imkoniyat berildi, deyish mumkin.

Hayit bayramini oilasi va yaqinlari bag'rida nishonlash imkoni berilgan sobiq mahkumlar 8 nafari Urgut tumanidan, 5 nafari Paxtachidan. Qo'shrabot va Kattaqo'rg'on tumanlaridan 4 nafardan.

Farmon bilan 9 nafar probatsiya nazorati ostida bo'lgan shaxslarning ham qilmishi kechirilgan.

Afv etilgan shaxslarning ijtimoiy hayotga moslashib, foydali mehnat bilan shug'ullanishlari, sog'lom turmush tarzini yo'lga qo'yib, jamiyatda munosib o'rin topishlari uchun ularga ko'mak berish bo'yicha mas'ul tashkilot va idoralarga tegishli topshiriqlar berilgan.

Y.MARQAYEV.

Keyingi kunlarda ijtimoiy tarmoqlarda kuchli yog'ingarchilik tufayli ayrim hududlarga sel kelib, aholi xonadonlari, ko'cha va yo'llarni suv bosganligi aks etgan surat va videolavhalar paydo bo'lmoqda. Bu holat Urgut, Nurobod, Qo'shrabot, Ishtixon, Narpay tumanlaridagi tog'li va dasht hududlarida yuzaga kelgani aytilmoqda.

- Joriy yilning 12-15-aprel kunlari viloyatimizning ayrim hududlarida kuchli yomg'ir yog'ishi natijasida ko'p miqdordagi yomg'ir suvlari ariq va lotoklarning quvurlariga sig'masdan to'planib qolish holatlari kuzatildi, - deydi viloyat favqulodda vazi-

OGOHI BO'LING, kuchli yomg'irlar hali davom etadi

yatlar boshqarmasi boshlig'i Ilhom Ismoilov. -Suv toshqinlaridan yordam so'rab 10 nafar fuqarodan bizga murojaat kelib tushdi. Jumladan, Nurobod tumanidagi Sarikul, Do'stlik va Po'latchi mahallalarida sel oqimlari va suv toshqinlari yuzaga keldi. Shuningdek, Kattaqo'rg'on shahridagi ayrim ko'chalarni, Samarqand shahridagi Chuquryo'l, Rudakiy, Mirzo Bedil ko'chalarni suv bosib, mashinalar va piyodalar harakatiga xalaqit bergan. Biroq, hozirda vaziyat to'liq nazoratga olinib, FVB, IIB,

hokimlik va boshqa hamkor tashkilotlar hodisa oqibatlarini bartaraf etmoqda.

Ayni damda Samarqand shahridagi 8 ta yomg'in-qutqaruv bo'linmasining avariya brigadalarida motopompalar, suv o'tkazmaydigan kiyimlar hamda boshqa zurr asbob-uskunalar shay holatda bo'lib, ular yordamida sel oqibatlarini bartaraf etilmoqda. Toshqinlar natijasida fuqarolarning jabrlanishi va uy-joylari zarar ko'rganligi to'g'risida ma'lumotlar qayd etilmagan. Viloyatning sel va ko'chki xavfi mavjud

hududlarida, xususan, Urgut tumanida 8 ta, Samarqand tumanida 2 ta, Nurobod tumanida 4 ta va Qo'shrabot tumanida 3 ta, jami 17 ta nazorat-kuzatuv postlari tashkil etilib, vaziyat bo'yicha muntazam aloqa yo'lga qo'yilgan.

Viloyat favqulodda vaziyatlar boshqarmasi va uning tarkibiy tuzilmalari kuchaytirilgan tartibda, hodisa oqibatlarini tezda bartaraf etishga shay holatda xizmat olib bormoqda.

O'zgidrometeorologiya markazining xabariga ko'ra, 16-17-aprel kunlari mamlakatimiz hududida kuchli yomg'ir yog'ishi kutilmoqda. Jumladan, viloyatimizning Kattaqo'rg'on, Samarqand, Payariq, Urgut, Nurobod, Bulung'ur, Qo'shrabot, Jomboy, Ishtixon tumanlarida sel-suv toshqini xavfi yuzaga kelishi mumkin. **Dilmurod TO'XTAYEV.**

2023-yil 7-22-noyabr kunlari Parij shahrida bo'lib o'tgan YUNESKO Bosh konferensiyasining 42-sessiyasi yakunida uning navbatdagi, 43-sessiyasini 2025-yilda Samarqand shahrida o'tkazish bo'yicha tarixiy qaror qabul qilindi. Ushbu qarorni tashkilotga a'zo 194 davlatning barchasi qo'llab-quvvatladi. Qaror shunisi bilan e'tiborlik, shu paytga qadar tashkilotning birona sessiyasi Parijdan tashqarida bo'lib o'tmagan.

Tarixiy hodisa: "BMTning aql laboratoriyasi" Samarqandda qaror qabul qiladi

YUNESKO BMTning ixtisoslashgan muassasalaridan biri bo'lib, Ikkinchi jahon urushidan so'ng, 1946-yil tashkilotning asl maqsadi a'zo mamlakatlarda ta'lim, fan, madaniyat va axborot-kommunikatsiya sohaslarini rivojlantirishdan iborat. Bosh qarorgohi Parij shahrida joylashgan. YUNESKO norasmiy ravishda "BMTning aql laboratoriyasi" deb ataladi.

Hozirda YUNESKOga 194 mamlakat a'zo. Yana 12 mamlakat va hududlar assotsiati a'zo maqomiga ega. Bugungi kunda 400 dan ortiq xalqaro nohukumat tashkilot va jam'armalar, xalqaro va hududiy birlashmalar YUNESKO bilan hamkorlik qiladi. YUNESKoning umumjahon ro'yxatidagi moddiy madaniy meroslar soni 1121 tani tashkil etadi. Mazkur ro'yxatga O'zbekistondan Ichan qal'a (1990-yilda), Buxoro shahrining tarixiy qismi, Shahrisabz shahrining tarixiy qismi va Samarqand shahri (2001-yilda) kiritilgan.

YUNESKO umumjahon ro'yxatidagi nomoddiy madaniy meros soni 500 dan ortiqni tashkil etadi. O'zbekistondan Boysun tumani madaniyati (2008-yilda), Shashmaqom (2008-yilda - O'zbekiston va Tojikiston), katta ashula (2009-yilda), askiya - aql-idrok san'ati (2014-yilda), Navro'z (2016-yilda O'zbekiston va yana 11 davlat), Palov tayyorlash madaniyati va urf-odat (2016-yilda), Marg'ilon hunarmandchilikni rivojlantirish markazi, atlas va adras matolarini to'qishning an'anaviy texnologiyasi (2017-yilda), Xorazm lazgisi (2019-yilda) kiritilgan.

Samarqandda nufuzli anjumanni o'tkazish



yuvasidan mamlakatimiz rahbarining "2025-yilda YUNESKO Bosh konferensiyasi 43-sessiyasining Samarqand shahrida o'tkazilishiga tayyorgarlik ko'rish bo'yicha chora-tadbirlar to'g'risida"gi qarori ham e'lon qilindi. Ushbu qarorning o'zida asosiy tayyorgarlik jaryonlari, amalga oshirilishi kerak bo'lgan ishlar aniq belgilab qo'yilgan. Xususan, Samarqand shahridagi tegishli madaniy meros obyektlarini asrashga doir ishlar hamda immersiv va mavzuli ko'rgazmalarni tashkil etish belgilangan. O'zbekiston Respublikasining Madaniy yodgorliklarni saqlash va restavratsiya qilish bo'yicha xalqaro tadqiqot markaziga a'zo bo'lishi uchun harakatlar boshlanishi ham qarorda ko'rsatib o'tilgan.

Shuningdek, YUNESKO ishlari bo'yicha milliy komissiya O'zbekistondagi shaharlar, noyob madaniy va tabiiy meros obyektlarini tegishli YUNESKoning Ijodkor shaharlar hamda Ta'limni targ'ib etuvchi shaharlar tarmoqlariga, shuningdek, xalqaro ro'yxatlariga kiritish choralari ko'radi.

YUNESKO mezonlari asosida va xorijiy ekspertlarni jalb etgan holda Samarqand shahrida Buyuk ipak yo'li davlat muzeyini tashkil etish, sobiqqiron Amir Temur bog'larini qayta tiklash, Bibixonim majmuasini restavratsiya qilish, Umumjahon me-

rosi ro'yxatiga kiritilgan Buxoro tarixiy markazini muhofaza qilishga qaratilgan ishlar olib borilishi rejalashtirilgan.

Samarqand viloyat hokimining mazkur anjumanni tashkil etish yuzasidan qarori qabul qilingan bo'lib, unda tashkiliy ishlar aniq belgilab berilgan. Xususan, anjuman bo'lib o'tadigan Silk Road Samarqand majmuasida mehmonlar uchun barcha shart-sharoitlarni yaratish bo'yicha ishlar olib borilmoqda. Registon majmuasi, Afrosiyob shahri xarobalari, Shohi Zinda majmuasida ko'rgazma loyihalarini, shuningdek, Mirzo Ulug'bek rasadxonasida yangi ko'rgazma maydonini tashkil etish yuzasidan ekspertlar jalb etilmoqda.

Samarqand keyingi ikki-uch yilda yirik xalqaro anjumanlarni yuqori saviyada o'tkazishda katta tajriba to'pladi. Nafaqat turli tashkilot vakillari, balki butun Samarqand ahlining mehmonavozligi, qadimiy va navqiron Samarqand nomiga munosib tarzda jarayonlarda ishtirok etishi xalqaro mashvaratlar ishtirokchilarning e'tirofiga sazovor bo'ldi. Shu ma'noda mazkur yuqori darajadagi anjumaning barcha xalqaro talablarga javob bergan holda o'tkazilishi uchun viloyat ahli uyushqoqlik bilan harakat qilishiga ishonamiz.

Rustam QOBILOV,
viloyat hokimi
o'rinbosari.

Prezidentimizning 2021-yil 9-dekabrda "Yangi O'zbekiston" massivlarini qurish va hududlarning ijtimoiy-iqtisodiy rivojlanishini ta'minlash chora-tadbirlari to'g'risida"gi farmoni ijrosini ta'minlash maqsadida viloyatimizning Urgut hamda Bulung'ur tumanlarida «Yangi O'zbekiston» massivlari qurilyapti.

Jumladan, Bulung'ur tumanining Olmazor mahallasi hududidan yangi massiv uchun qariyb 24 gektar yer maydoni ajratilgan bo'lib, 56 ta ko'p qavatli uy-joy, 990 o'rinli 2 ta maktab, 120 o'rinli 2 ta maktabgacha ta'lim tashkiloti, mahalla binosi, oilaviy poliklinika va sport maydonchalari qurilishi belgilangan. Xo'sh, bugunga qadar hududda qanday ishlar amalga oshirildi?

- "Yangi O'zbekiston" massividagi ko'p qavatli uylarning qurilish ishlari 9 ta pudratchi tashkilot tomonidan olib borilmoqda, - deydi tuman hokimining o'rinbosari Norbo'ta Sanaqulov. - Massivdagi barcha uy-joylarga markazlashgan ichimlik suvi, issiqlik manbai, tabiiy gaz, elektr va oqova tarmoqlari tortilmoqda. Hududda markazlashgan 1 ta suv inshooti va 1,2 kilometr ichimlik suv tarmog'i tortish ishlari bajarildi.

O'tgan yil 308 xonadonga mo'ljallangan 14 ta 5 qavatli uy foydalanishga topshirilib, hududda vaqtinchalik 1 dona

Bulung'urning Olmazorida yangi massiv qad rostlayapti



oqova suv inshooti qurildi. Hozirda yana bitta oqova inshootini qurish ishlari olib borilmoqda va joriy yil yakuniga qadar 12,5 kilometr oqova suv tarmog'i tortiladi va hududdagi barcha ko'p qavatli uylar oqova ta'minotiga ulanadi.

Ayni paytda massivda 32 ta 5 qavatli uyning qurilish-montaj ishlari olib borilmoqda. Bu uylar joriy yil yakuniga qadar foydalanishga topshiriladi. 2025-yilda esa maktab va maktabgacha ta'lim tashkilotlari, mahalla ma'muriy binosi, oilaviy poliklinika va sport maydonchalari qurilish ishlari to'liq tugatilib, obyektlar foydalan-

ishga topshiriladi.

Massivdagi uylar aholiga subsidiya va 20 yillik ipoteka krediti asosida berilmoqda.

- O'tgan yil ipoteka krediti asosida 3 xonali uyga boshlang'ich to'lov qilib, shu yil ko'chib keldik, - deydi 32-uyda yashovchi Mahliyo Namozova. - Xonalar shinam, issiqlik tizimiga ulangan, elektr, gaz, issiq va sovuq suv bor. Hududda kelgusi yil yangi maktab va bog'cha, sport maydonchalari ham qurilar ekan va bu farzandlarimiz uchun ayni muddao bo'lardi.

Fazliddin RO'ZIBOYEV.



Statistika boshqarmasiga ko'ra, viloyat bo'yicha 2024-yilning yanvar-fevral oylarida ulgurji savdo tovar aylanmasi 2 408,4 milliard so'mni tashkil etib, 2023-yilning mos davriga nisbatan 21,9 foizga o'sdi. Kichik biznes subyektlarining ulgurji savdo aylanmasidagi ulushi 1 191,2 milliard so'mni tashkil qilib, 2023-yilning mos davriga nisbatan 101,9 foizga to'g'ri keldi. Viloyatda ushbu sektorning ulgurji savdo hajmidagi ulushi 49,5 foizni tashkil etdi.

Maishiy chiqindi qayerda qayta ishlanadi?

Bugungi kunda viloyatimizdagi chiqindi poligonlarida kuniga to'plangan 1380 tonna chiqindi 24 ta qayta ishlovchi korxonalar tomonidan saralanib, xomashyoga aylantirilmoqda. Jumladan, Kattaqo'rg'on tumanida "Anvar biznes invest" MChJ, Paxtachi va Nar-pay tumanlarida "Mansurbek qo'rg'on" MChJ, Payariqda Shohimardon Asqarov oilaviy korxonasi plastmassa, qog'oz, shisha kabi maishiy chiqindilarni qayta ishlab, ikkilamchi mahsulotlar ishlab chiqarmoqda.

Samarqand shahrida joylashgan "Maroqandobod" davlat unitar korxonasi tomonidan kuniga 700 tonna, "Toza hudud" DUKga qarashli filial tomonidan 400 tonnadan ziyod maishiy chiqindi olib chiqilmoqda.

- Hozirda Samarqand shahri va tumanida korxonamizga qarashli 54 ta chiqindi to'plash shoxobchasi faoliyat ko'rsatmoqda, - deydi "Maroqandobod" DUK boshlig'i Rasul To'liqnov. - Markaziy poligonda 26 nafar ishchi tomonidan kuniga 550-600 tonna maishiy, 100-130 tonna qurilish chiqindilari saralanadi. Ular asosan, qog'oz, plastmassa chiqindilarni terib olishadi. Qolgan chiqindilar bir oyda bir marotaba zararsizlantirilib, rekultivatsiya qilinadi. O'tgan yili ikki marta Toshkent shisha ishlab chiqarish korxonasi shartnoma asosida xomashyo jo'natdik. Plastmassa va plastik mahsulotlarni esa "SAG", "Uzgazkarpet" kabi gilam ishlab chiqaruvchi korxonalar, shuningdek, Surxondaryo viloyatida faoliyat ko'rsatayotgan korxonalar ikkilamchi mahsulot sifatida yetkazib beryapmiz.

2018-yildan buyon Fransiya taraqqiyot agentligi ishtirokida amalga oshirilayotgan "Samarqand shahrida qattiq maishiy chiqindilar boshqaruvi modernizatsiya qilish" loyihasi bo'yicha ham ish olib borilmoqda. O'zaro hamkorlik davrida 80 ta yuk tashuvchi maxsus texnika keltirildi. Shuningdek, poligonidagi chiqindilarni saralash uchun 5 ta yig'uvchi, ortuvchi va tozalovchi texnika xarid qilindi.

Biroq so'nggi yillarda Samarqand shahrida qo'shimcha 15 ta chiqindi to'plash shoxobchasi uchun yer ajratish, loyiha asosida zamonaviy chiqindixona tashkil etish pajsalgina solinmoqda. Shuningdek, poligon va saralash majmuasi uchun xorijdan o'nga yaqin maxsus asbob-uskuna va texnika olib kelish qiyin kechmoqda. Bu holat loyihadagi maishiy chiqindilarni saralash zavodi hamda biogazni yoqilg'iga aylantirish tizimini ishga tushirish imkoniyatini bermayapti.

- Viloyatimizda 14 ta chiqindi poligoni bo'lib, "Toza hudud" unitar korxonasi shahar va tumanlar filiallaridan tashqari xususiy sanitar tashkilotlari tomonidan ham maishiy va qurilish chiqindilari olib chiqiladi va saralanadi, - deydi viloyat ekologiya, atrof-muhitni muhofaza qilish va iqlim o'zgarishi boshqarmasi chiqindilar bilan ishlash bo'limi boshlig'i Akmal Qo'shboyev. - Urgut shahridagi «Asia fiber» MChJ shisha buyumlari, Kamjangan mahallasidagi «Urgut China Karton» MChJ, "UNIPACK" MChJ qog'oz chiqindilaridan mahsulot ishlab chiqarayotgan bo'lsa, "Yalpoq-tepa plast" oilaviy korxonasi va "Ibroxim biznes baraka" MChJ ishlatilgan polimer chiqindilaridan



kundalik uchun o'ta zarur bo'lgan mahsulotlar tayyorlamoqda. Past Darug'om tumanida joylashgan «Uz Prista Regular» korxonasi esa ishlatilgan mashina moylarini yig'ib, qayta ishlamoqda.

Yaqinda Prezidentimizning qaroriga asosan, yurtimizda har yili "Tabiat uyg'unligi himoyachisi" va "Eng toza mahalla" tanlovlari o'tkazilib, g'oliblarni aniqlash va ularni taqdirlash tartibi belgilandi.

- Qarorga ko'ra, joriy yilning iyun oyidan boshlab sanitar tozalash korxonalarining chiqindilarni yuklash, tashish, joylashtirish va saralash ishlari bilan shug'ullanuvchi ishchilari, ekofaollar va jamoatchilik ekologiya nazoratchilarining 100 nafari har oyda bir marotaba velosiped va boshqa mukofotlar bilan taqdirlanadi, - deydi Akmal Qo'shboyev. - Tanlovda mahallada chiqindilarni to'plash, saralash hamda aholining ekologik tarbiyasi hamda madaniyati, daraxt va butalarni parvarishlashda suv tejovchi texnologiyalarni qo'llaganligi e'tiborga olinadi.

Shuningdek, "Eng toza mahalla" tanlovi g'olibi bo'lgan mahallalarga chiqindi yig'ish maydonchalari qurish, konteynerlar o'rnatish va daraxtlarni ekish uchun 500 million so'm pul mablag'i hamda xizmatda foydalanish uchun 1 tadan elektromobil topshiriladi. "Tabiat uyg'unligi himoyachisi" tanlovi g'oliblarining davlat OTMlariga to'lov-kontrakt asosida o'qishga kirgan farzandlari yoki nabiralarga kontraktning bir yillik to'liq summasi, biroq BHMning 30 baravaridan ortiq bo'lmagan qismi to'lab beriladi.

Bu tanlovlarni tashkil etishdan asosiy maqsad shahar va qishloqlarimizni chiqindilardan xoli maskanga aylantirishdan iborat. Shunday ekan, nafaqat chiqindilarni terib olish, balki ulardan tayyor mahsulotlar ishlab chiqarishni ham yo'lga qo'yish kerak.

Dilmurod TO'XTAYEV,
"Zarafshon" muxbiri.

Zamonaviy texnika va texnologiyalarning shiddat bilan rivojlanib borayotganligi insoniyat uchun moddiy boylik topishning cheklanmagan imkoniyatlarini bermoqda. Bu harakatlar quonuchilikda taqiqlanmagan usullarda amalga oshirilsa yaxshi. Ammo keyingi vaqtda bel og'ritmay pul topish ilinjida noqonuniy yo'lardan borib, boshi berk ko'chaga kirib qolayotganlar sonining ortayotganligi achinarli.

Onlayn qimor. Daromad topishning oson yo'li bo'lib ko'rinayotgan bo'lib o'yin Internet tarmog'i foydalanuvchilari uchun oddiy holatdek ko'rinsa-da, ko'pchilik katta tashvish keltirmoqda. Uning ishtirokchilari o'yinlarga oilasining mablag'larini sarflab yuborayotganligi, ko'p hollarda qarz olib,

Qimorda g'oliblar bo'lmaydi

qarzdorlik botqog'iga botayotganligi haqida eshitgandirsiz. Eng achinarlisi, qimorga mukkasidan ketib, bor budini boy bergan ayrim insonlar navbatdagi o'yin uchun pul topolmagach, o'g'rilik yoki firibgarlikka qo'l urmoqda.

Yodda tuting! O'zbekiston Respublikasi Ma'muriy javobgarlik to'g'risidagi kodeksining 191-moddasida qimor va tavakkalchilikka asoslangan boshqa o'yinlarda qonunga xilof ravishda ishtirok etish, voyaga yetmagan shaxsni shunday o'yinlarga jalb qilish, qimor va tavakkalchilikka asoslangan boshqa o'yinlarni tashkil etish yoki o'tkazish uchun telekommunikatsiya tarmoqlarida, shu jumladan, Internet jahon axborot tarmog'i provayderlari tomonidan xizmatlar ko'rsatish yoki xizmatlar ko'rsatishga ko'maklashish, tegishli dasturiy ta'minotdan nusxa olish, uni ko'paytirish, tarqatish uchun ma'muriy javobgarlik belgilangan.

Jinoyat kodeksining 278-moddasi 1 va 2-qismlarida esa qimor va

tavakkalchilikka asoslangan boshqa o'yinlarni qonunga xilof ravishda tashkil etish yoki o'tkazish, shu jumladan, ana shunday o'yinlar uchun qimorxonalar tashkil etish yoki ularni saqlash, shuningdek, ushbu jinoyatni takroran yoki xavfli retsidentist tomonidan, uyushgan guruh tomonidan yoki uning manfaatlarini ko'zlab sodir etilishi og'ir jinoyat sifatida tasniflangan. Ushbu moddaning 3 va 4-qismlarida fuqaro tegishli noqonuniy harakatlarni unga nisbatan ma'muriy jazo qo'llanilganidan keyin qayta sodir etsa, jinoyat javobgarlikka tortilishi belgilangan.

Albatta, jinoyat uchun jazo muqarrar va bu amalda ta'minlanib kelinmoqda. Shu bilan birga, ayni yo'nalishdagi jinoyatlarning oldini olish ham muhim masaladir. Internet tarmog'ining nazoratsizligi va undagi onlayn qimor o'yinlarini butunlay cheklash imkoniyati bo'lmayotgan bir paytda bu yagona yechim hisoblanadi.

Fruz MAMATQULOV,
Samarqand harbiy sudining devonxona mudiri.

Matbuot uyida "Hududiy elektr tarmoqlari" AJ Samarqand hududiy filiali tashabbusi bilan tashkil etilgan anjumanida joriy yil viloyatimizda elektr ta'minotini yaxshilash borasidagi rejalari bo'yicha ma'lumot berildi.

- Joriy yilda Urgut, Oqdaryo va Samarqand tumanlari va Samarqand shahrida 2 ta podstansiya va 244 ta transformator punkti, 12696 ta beton ustun o'rnatilib, 560,3 kilometr elektr uzatish tarmoqlari yangidan qurildi, - deydi "Hududiy elektr tarmoqlari" AJ Samarqand hududiy filiali direktori o'rinbosari Eldor Mamasoliyev. -Turli quvvatdagi 8 ta yangi

Joriy yilda yana nechta podstansiyaning quvvati oshiriladi?

kuch transformatorlari yuklama bilan ishlayotgan 50 ta transformatorga almashtirilib, 351,2 MWt quvvat zaxirasi yaratiladi. Hozirda 2 ta 40 ming kVA transformator hamda 1 dona 63 ming kVA kuch transformatori o'rnatishga tayyor.

Shuningdek, yana ikki oy ichida 35/6 kW li podstansiyalar uchun 8 ta kuch transformatori olib kelinadi. Kuz-qish mavsumiga tayyorgarlik ko'rish maqsadida 10 ta podstansiya, 1197 ta

transformator, 3003,9 kilometr elektr tarmoqlarini mukammal hamda 132 ta podstansiya, 1988 ta transformator, 7021,9 kilometr elektr tarmoqlarini joriy ta'mirlash ishlari bajariladi.

Tabdirda yirik fotoelektr stansiyalar va quyosh panellari o'rnatish hisobiga 419,5 million kWt/soat, tarmoqlar modernizatsiyasi hisobiga esa 98,6 million kWt/soat elektr energiyasi iqtisod qilanganligi ta'kidlab o'tildi.

D.TO'XTAYEV.

Qishloq xo'jaligi rivojlangan AQSh, Germaniya va Yevropa mamlakatlarining taxminan 70 foizi sohada zamonaviy aqlli texnologiyalardan foydalanmoqda. Jumladan, Gollandiya qishloq xo'jaligida raqamli texnologiyalar keng qo'llanilib, robotlardan, turli xil jarayonlarni boshqarishda yordam beradigan internet buyumlaridan (IoT) foydalaniladi.



Qishloq xo'jaligida raqamli texnologiyalar qo'llanyapti

Hindistonda esa fermerlarning bilim va malakasini oshirishga, xususan, ob-havo, mahsulot narxi, ekinlarni yetishtirish uchun eng yaxshi texnologiyalar va boshqalar to'g'risida ma'lumot beradigan mobil ilovalarni joriy etishga e'tibor qaratiladi. Har bir hududda qishloq xo'jaligida innovatsion va ilmiy markazlar tashkil etilgan.

Qishloq xo'jaligining raqamli transformatsiyasi soha mutaxassislaridan zamonaviy bilimlarga ega bo'lish barobarida, ularga yordam beradigan yangi "nooodatiy" yechimlarni talab qiladi. Hozirgi kunda global miqyosda inson faoliyatining deyarli barcha sohalarida raqamli texnologiyalardan foydalanish tez sur'atlar bilan rivojlanib bormoqda. Qishloq xo'jaligi ham bundan mustasno emas. Shu bois mamlakatimizda ham so'nggi yillarda tarmoqda raqamli iqtisodiyotni rivojlantirishga alohida ahamiyat berilyapti.

Hindiston mexanika va injenerlik - muhandislik ilmiy-tadqiqot instituti bilan Toshkent davlat iqtisodiyot universitetining Samarqand filiali, Samarqand agroinnovatsiyalar va tadqiqotlar instituti hamkorlikda "O'simliklarni himoyasi va avtomatik sug'orish tizimiga asoslangan tuproqlar monitoringida ilg'or raqamli texnologiyalardan foydalanish" mavzusida xalqaro ilmiy loyiha olib borildi. Loyiha dehqon va fermer xo'jaliklari uchun avtomatik sug'orish tizimida tuproq xususiyatlarini tahlil qilish hamda o'simliklarni himoya qilishda IoT texnologiyalariga asoslangan mobil dasturni ishlab chiqish va joriy etish maqsadida tuzildi.

Loyihani amalga oshirish doirasida to'plangan ma'lumotlarni saqlash uchun masofaviy ma'lumotlar bazasi sifatida Google kompaniyasiga tegishli Firebase Realtime ma'lumotlar bazasi yechimidan foydalanildi. Firebase Realtime ma'lumotlar bazasi "bulut"da joylashgan ma'lumotlar bazasidir. Jarayonni amaliyotga joriy etish uchun Samarqand agroinnovatsiyalar va tadqiqotlar instituti hududidagi kichik dala maydoni tanlandi. Mazkur dalada sabzavot ekinlaridan pomidor va kartoshka yetishtirish uchun avtomatlashtirilgan sug'orish tizimi o'rnatilib, ishga tushirildi. Zamonaviy maxsus texnologiyaning afzalligi shundaki, mazkur usulda suv avval hovuzga to'planib,

nasos yordamida asosiy quvurga, undan esa ekin maydoni bo'ylab tortilgan maxsus teshikchali kichik polietilen quvurlarga haydaladi. Suv oqib, loyqa hosil qilmagani bois yer qotib qolmaydi. Tuproqdagi foydali mikroelementlar yuvilib ketmaydi. O'g'it ham avval eritilib, suv bilan qo'shib berilishi sabab barcha ekinlarga birdek yetib borishi va so'rilishi ta'minlanadi. Shu bois an'anaviy sug'orish usuliga qaraganda ancha kam o'g'it sarflab, bir necha barobar ko'p samaraga erishish mumkin.

Ma'lumotlarni to'plash, uzatish hamda jamlash uchun loyiha kichik model dalasiga maxsus datchik va sensorlar o'rnatildi. Ushbu datchik va sensorlardan foydalanish aqlli tizimni yaratishda muhim ahamiyat kasb etadi. Ular bir necha kvadrat kilometr joydan radiokanal orqali nazoratdagi obyektlarning holati, asosan, tuproqning namlik darajasi, harorat, o'simlikning sog'lomlik darajasi, yonilg'i zaxirasi va boshqa muhim parametrlar haqida uzluksiz ma'lumot yetkazib turadi. Ekin maydonining tuproq namlik darajasi, havo harorati, havoning namlik darajasi kabi ma'lumotlarni yig'ib olish jarayoni dalaga o'rnatilgan sensorlar yordamida amalga oshiriladi.

Loyiha amalda muvaffaqiyatli qo'llanilib, o'z natijasini berdi. Aytish mumkinki, IoT texnologiyasi orqali oziq-ovqat mahsulotlarining o'sish muhitini oqilona tartibga solish uchun ularni ekishning turli bosqichlarida maqsadli boshqaruv amalga oshirilishi kutilgan natijani bermoqda.

Loyiha 2021-2023-yillar uchun mo'ljallangan bo'lib, o'tgan yilning dekabr oyida muvaffaqiyatli yakunlandi. Loyiha uchun Innovatsion rivojlanish agentligi tomonidan 750 million so'm ajratildi.

Ayni paytda loyiha Samarqand agroinnovatsiyalar va tadqiqotlar institutiga tegishli maxsus yer maydonida amaliyotga joriy etilmoqda. Kelajakda tadbirkorlarimiz o'z dala maydonlarida mobil dastur orqali boshqaruvni yo'lga qo'yadi va suvdan tejamkorlik bilan foydalangan holda yuqori hosil olishga erishadi.

Olim MURTAZAYEV,
Toshkent davlat iqtisodiyot universiteti Samarqand filiali direktori.

Samarqandda pedagoglar attestatsiyasi boshlandi



Kecha viloyat bilimlarni baholash markazida pedagog kadrlar attestatsiyasiga start berildi.

Tadbirning ochilish marosimida so'zga chiqqan viloyat maktabgacha va maktab ta'limi boshqarmasi boshlig'i Shahzod Eshonqulov, viloyat hokimining ta'lim masalalari bo'yicha maslahatchisi Saidahmad Usmonov, maktabgacha va maktab ta'limi vazirligidan kelgan mas'ullar o'qituvchilarga omad tiladi.

Bu yilgi pedagoglar malaka toifasi uchun tashkil qilingan attestatsiya jarayonlarida viloyatdan 21 ming 430 nafar pedagog ishtirok etishi ko'zda tutilgan.

Amaliyotga joriy etilgan yangi tizim asosida malaka toifasini olish sinovlari ikki bosqichda o'tkaziladi. Birinchi bosqichda pedagogning mutaxassislik fani va kasb standart bo'yicha bilim darajasi baholanadi. Bunda pedagoglarga mutaxassislik fani bo'yicha 35 ta hamda kasbiy standartlarga oid 5 ta test savollari beriladi. Ikkinchi bosqichda pedagog mahorati baholanadi. Buning uchun 10 ta savol-topshiriq beriladi. Har ikkala bosqich ham kompyuterda real vaqt rejimida (onlayn) o'tkaziladi. Natijada tashqi aralashuvning oldi olinib, inson omili aralashuviga barham beriladi.

Test sinovida har bir nomzodga matematika, fizika, kimyo, biologiya, informatika fanlari uchun 2 soat (120 daqiqa), qolgan fanlardan 1,5 soat (90 daqiqa) vaqt beriladi.

Attestatsiya jarayonlari joriy yilning may oyi oxiriga qadar davom etadi.

Viloyat bozorlar va savdo komplekslari uyushmasi rahbarlari ishtirokida o'tkazilgan matbuot anjumanida qayd etilishicha, hozirda uyushma tasarrufida 41 ta dehqon bozori va 18 ta savdo kompleksi mavjud. 2023-yilda bozorlar va savdo komplekslari tomonidan 84 milliard 290 million so'mdan ortiq tushum tushirildi.

Bu yil bozorlarda qanday o'zgarish bo'ladi?

Aholini asosiy turdagi oziq-ovqat va qishloq xo'jalik mahsulotlari bilan uzluksiz ta'minlash maqsadida kuz-bahor mavsumida bozorlarda 3200 tonnadan ortiq mahsulot zaxirasi yaratilgan.

- Hozirgacha zaxiraga jamg'arilgan mahsulotlar tadbirkorga tegishli omborxonada saqlanardi va bu tannarxning ortishiga olib kelardi, - deydi viloyat bozorlar va savdo komplekslari uyushmasi raisi o'rinbosari Akmal Qudratov. - 2024-yilda uyushma qoshida markazlashtirilgan sovut-kichik omborxonalar qurish rejalashtirilgan. Shuningdek, Kattaqo'rg'on, Urgut, Paxtachi, Oqdaryo, Jomboy dehqon bozorlarida kapital qurilish va obodonlashtirish, viloyatdagi barcha bozorlar va savdo komplekslarida zamonaviy loyihalar asosida hojatxonalar qurish rejalashtirilgan. Barcha dehqon bozorlari va savdo komplekslarida joriy ta'mirlash ishlari amalga oshirish, sotuvchi va xaridorlar uchun qo'shimcha qulayliklar yaratish, shuningdek, tushum pullarining jamiyat hisob-raqamlariga to'liq kirim qilinishini ta'minlash maqsadida avtomatlashtirilgan tizim joriy qilinadi.

O.XUDOYBERDIYEV.



REKLAMA, E'LONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUHOJAAT UCHUN TELEFON: 66-233-91-56

DA'VOLAR BO'LSA...

Payariq tumanida xususiy amaliyot bilan shug'ullanuvchi notarius Ortiqboyev Aziz Azamatovich notarial idorasida marhum Tuychiyev Nuriddin Malikovichga (2021-yil 13-iyunda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ortiqboyev Aziz Azamatovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqlol ko'chasi, 73-uy.

Narpay tumanida xususiy amaliyot bilan shug'ullanuvchi notarius Pardayev Mehridin Muhiddin o'g'li notarial idorasida marhum Nurmamatov Axtam Pirmamatovichga (2020-yil 15-avgustda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Pardayev Mehridin Muhiddin o'g'li notarial idorasiga murojaat etishlarini so'raymiz.

Manzil: Narpay tumani "Alisher Navoiy" MFY, Amir Temur ko'chasi.

Samarqand shahrida xususiy amaliyot bilan shug'ullanuvchi notarius Ahmedova Farangiz Aslamovna notarial idorasida marhum Raxmanova Mavjuda Qurbanovnaga (2024-yil 20-martda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ahmedova Farangiz Aslamovna notarial

idorasiga murojaat etishlarini so'raymiz.
Manzil: Samarqand shahri Lutfiy ko'chasi, 80-uy.

Payariq tumanida xususiy amaliyot bilan shug'ullanuvchi notarius Toshtemirov Alisher Po'latovich notarial idorasida marhum Usmanov Islamga (2022-yil 13-aprelda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Toshtemirov Alisher Po'latovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Obod ko'chasi, 35-uy, 3-xona.

Samarqand shahrida xususiy amaliyot bilan shug'ullanuvchi notarius Murtazayev Sherzod Sobirovich notarial idorasida marhum Raupova Soxiba Kurbanovnaga (2020-yil 4-noyabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Murtazayev Sherzod Sobirovich notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 64-uy.

Jomboy tumanida xususiy amaliyot bilan shug'ullanuvchi notarius Mirzayeva Barno Jo'raqulovna notarial idorasida marhum Yuldashov Shavkat Sattarovichga (2023-yil 13-oktabrda vafot etgan) tegishli mol-mulk uchun

meros ishi ochilmoqda. Shu munosabat bilan merosxo'rlarning Mirzayeva Barno Jo'raqulovna notarial idorasiga murojaat etishlarini so'raymiz.

Manzil: Jomboy tumani Zebuniso ko'chasi, 4-"A" uy.

Toyloq tumanida xususiy amaliyot bilan shug'ullanuvchi notarius Valixodjayev Farzod Botirovich notarial idorasida marhum Djurayev Alijon Turobovichga (2023-yil 23-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Valixodjayev Farzod Botirovich notarial idorasiga murojaat etishlarini so'raymiz.

Manzil: Toyloq tumani Toyloq shaharchasi.

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasida marhum Umarov Ochiq Usmanovichga (2023-yil 13-mayda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aliyeva Lola Zoirovna notarial idorasiga murojaat etishlarini so'raymiz.

Manzil: Samarqand shahri Amir Temur ko'chasi, 158-uy.

Kattaqo'rg'on shahrida xususiy amaliyot bilan shug'ullanuvchi notarius Botirov Ozod Komiljonovich notarial idorasida marhum Burxonova Jamilla Pulatovnaga (2023-yil

OCHIQ MA'RUZA O'TKAZILADI!

Samarqand davlat tibbiyot universiteti diplomdan keyingi ta'lim fakulteti terapiya, kardiologiya va funksional diagnostika kafedrasida 2024-yil 7-may kuni soat 10:00 da ochiq ma'ruza bo'lib o'tadi.

Mavzu: "Хроническая сердечная недостаточность: универсальный подход ведения коморбидного больного". ("Surunkali yurak yetishmovchiligi: komorbid bemorni davolash uchun universal yondashuv")

Ma'ruzachi: t.f.n., professor Agababyan I.R.

Manzil: SamDTU DKTF terapiya, kardiologiya va funksional diagnostika kafedrasida ma'ruza zali (Respublika ixtisoslashtirilgan kardiologiya markazi 2-korpus 2-qavat, Samarqand shahri Mirzo Ulug'bek ko'chasi, 144).

Taklif qilinganlar: Terapiya kafedralari tinglovchilari va shifokorlari, ushbu mutaxassisliklar bo'yicha ta'lim olayotgan klinik ordinatorlar va magistratura rezidentlari, o'quv bo'limi va barcha qiziquvchilar.

Kafedra mudiri t.f.n., professor I.R.AGABABYAN.

10-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Botirov Ozod Komiljonovich notarial idorasiga murojaat etishlarini so'raymiz.

Manzil: Kattaqo'rg'on shahri Alisher Navoiy ko'chasi, 148-uy.

BEKOR QILINADI
Fuqaro Kabulova Barno Salexovnaga qarashli Samarqand tumani Rustam mahallasida joylashgan uy-joyning (kadastr raqami 14:12:05:01:01:0749:0002) kadastr

hujjatlari to'plami yo'qolganligi sababli bekor qilinadi.

Urgut tumanidagi Yangiobod mahalla fuqarolar yig'inining (STIR: 202820509) dumaloq muhri va burchak tamg'asi yo'qolganligi sababli bekor qilinadi.

Samarqand shahridagi Sharapov Dostonbek Rustamjon ug'li yakka tartibdagi tadbirkorining (JSHSHIR: 32506976180034) dumaloq muhri va burchak tamg'asi yo'qolganligi sababli bekor qilinadi.



Xo'ja Ahrori Valiy Navoiyni saltanatga qaytargan

Samarqand tumanining aynan shahar bilan tutash Xo'ja Ahrori Valiy mahallasi hududida Naqshbandiya tariqatining yirik arbobi, Buxorodagi Bahovuddin Naqshband ta'limotining davomchisi Xo'ja Ahrori Valiy qabri joylashgan. Keyinchalik shu yerda 1630-yillarda Samarqand hokimi Nodir Devonbegi tomonidan masjid va madrasa qurilgan.

Shu yerda qisqagina ushbu alloma-bobokalonimiz haqlarida aytib o'tsam. U kishi 1404-yili Toshkent atrofida xushmanzara mavzeldardan biri - Bog'istonda tug'ilgan. Otasi Xo'ja Mahmud va buvalari ma'rifatli kishilar bo'lib, dehqonchilik va tijorat bilan shug'ullanishgan. Ona tomonidan esa mashhur Shayx Xovandi Tohurga borib taqaladi.

Xo'ja Ahrori Valiy juda xalqparvar bo'lib, o'zining yer mulkidan keladigan daromadni xayrli ishlarga sarflagan. Chunonchi Umarshayx Mirzo Toshkent aholisidan 250 ming dinor soliq talab qilganda u kishi xalq nomidan ushbu soliqni ortig'i bilan o'z hisobidan to'lagan.

Undan tashqari, u kishi temuriy shahzodalar va boshqa hukmdorlar bir-birlari bilan urushganda o'z obro'yidan foydalanib, ularni yarashtirgan. Jumladan, 1458-yili sulton Abusaid Mirzo o'g'illari Sulton Ahmad Mirzo, Umarshayx Mirzo va Yunusxonni o'g'li Sulton Mahmudlar orasida bo'lishi mumkin bo'lgan urushning tinch yo'li bilan hal qilinishiga sababchi bo'lgan. Shuning uchun temuriy shahzodalar u kishini o'zlarining ma'naviy ustozlari deb bilishgan. Xususan, Zahiriddin Muhammad Boburning u kishiga hurmati juda baland bo'lgan. Umarshayx Mirzo o'g'liga Zahiriddin Muhammad ismini Xo'ja Ahrori Valiy maslahati bilan qo'ygan. Keyinchalik Bobur Xo'ja Ahrori Valiyning "Risolai Volidiya" kitobini fors tilidan o'zbek tiliga nazmda tar-

jima qilgan. Undan tashqari, u o'zining butun dunyoga mashhur "Boburnoma" asarida bir necha bor Xo'ja Ahrori Valiyning tilga olingan.

Xo'ja Ahrori Valiyning bizgacha "Faqarot ul-orifin", "Risolai Volidiya" va "Havroiyya" kitoblari yetib kelgan. U kishi milodiy 1490-yilda Urgut tumani Kamongaron qishlog'ida vafot etib, yuqorida aytib o'tilganidek Xo'ja Ahrori Valiy mahallasi hududida dafn etilgan.

Shularni hisobga olib, Xo'ja Ahrori Valiy ansambliga doir ikkita taklif bermoqchiman. Birinchi taklif ushbu ansambl qoshida kichikroq bo'lsa-da, Xo'ja Ahrori Valiy muzeyini qurish kerak. U yerga Xo'ja Ahrori Valiyga aloqador ayrim kitoblarning zamonaviy nusxalarini qo'yish mumkin. Yana bu yerga Xo'ja Ahrori Valiyning ona tomonidan bobosi Shayx Xovandi Tohurning poytaxtimiz Toshkentdagi maqbarasi maketi (hech bo'lmasa, fotosurati) qo'yilishi mumkin.

Ikkinchi taklifim mavzusi butunlay boshqa. Ma'lumki, ushbu dargohni ziyorat qilish uchun avvalo, yurtodoshlarimiz, dunyoning turli burchaklaridan asosan musulmon sayyohlar tashrif buyurishadi. Atrofdan oshxonalar, kafe, restoranlar ko'p, lekin ular zamonaviy bo'lib, turli din va millat vakillariga xizmat ko'rsatishga moslashgan. Musulmon ziyoratchilarga xizmat ko'rsatish uchun maxsus, halol maqomidagi oshxonalar qurilsa, turizm rivojiga xizmat qilardi.

Rustam VAFOYEV,
Samarqand tumani.

Har qanday millat farzandlarining sog'lom, aqlli va bilimli bo'lishini xohlaydi. Psixolog olimlarning fikricha, bolalar butun umri davomida o'zlashtiradigan bilimlarning 70 foizini 7 yoshgacha qabul qilar ekan. Ushbu ma'lumotni e'tiborga olgan yapon onalari bolaga go'dakligidan quyidagicha tarbiya berar ekan.

Agar yapon oilasida farzand tug'lsa, ona uning tarbiyasini o'z hayotining asosiy maqsadi deb biladi. Oilada o'g'il bola tug'lsa, uni oilasi va mamlakatning kelajakdagi tayanchi deb tarbiyalashga kirishadi. Qiz farzand tug'lsa, uni aqlini taniganidan boshlab oila yumushlariga tayyorlashadi va atrofida odamlar bilan chiroyli muloqot qilishga o'rgatishadi.

Yapon onasining bola tarbiyasidagi faoliyati har qanday insonni lol qoldiradi. U bir yashar bolasida o'ziga ishonchni tarbiyalaydi va unga yapon, ingliz va rus tillaridagi rasmiy kitoblarni o'qib beradi, rasmlarini tomosha qildiradi.

Yapon yigitiga turmushga chiqqan samarqandlik ayolning aytishicha, qaynonasi keliniga o'zbek tilidagi kitoblarni ham bolasi-ga o'qib berdirar ekan. Bola kitobni tinglab, bu orqali unda ixtiyoriy diqqat rivojlanar ekan. Eng qizig'i, har kuni bolani cho'miltirib yotqizgandan so'ng yarim soat kitob o'qib berilmasa, go'dak uxlamas ekan. Demak, yapon onasi bolasini go'dakligidan shunday yashash tarziga ko'niktirib boradi. Ushbu amaliyotni Yaponiyaga kelin bo'lib tushgan ayolning Samarqanddagi oilasiga qilib ko'rishsa, bizning bolalar quloq ham solishmabdi, hatto kitobga qarashmabdi ham. Buning sababi, bizda go'dak bolaga kitob o'qib berish urfga aylanmagan. Demak, kitob o'qishni bolalarning ongiga go'dakligidan singdirish kerak. Shuning uchun ham yaponlar ertalabdan oziq-ovqat do'konida emas, aksincha, kitob do'konida navbatda turishadi.

Bolani mehnatkash qilib o'stirishda ham yapon onalarining tajribasini o'rganish maqsadga muvofiq. Bu yurt onalari 2 yoshli bolasini qo'l mehnati bilan tanishtiradi. U idish-tovoq yuvishdan, uni artib, joyiga qo'yishni bolasining ko'z o'ngida bajaradi. Xonalarni tozalash, tikish-bichish, to'qish kabi

Yaponlardan nimalarni o'rganamiz?

ishlarni ham bolaning oldida qiladi. Bizning onalar esa bolani uxlatib, uy-yumushlarini bajarishadi. Demak, bizning bolalar 7 yoshgacha o'zlashtirishi zarur bo'lgan ko'nikmalaridan bebahra qoladi.

Yapon onasi 3 yoshli farzandida mas'uliyatni anglashni tarbiyalaydi. Bizda esa hatto ba'zi katta yoshli odamlarimizda ham mas'uliyat yetarli emas. Kasbiga sodiqlik bilan yondashish o'rniga vazifasini qo'l uchida, kun o'targa, naridan-beri bajaradigan va maoshni kutib yashaydiganlar istalgancha topiladi.

Shuningdek, 40 yoshdan oshgan o'g'ilimiz yashaydigan xonaga kirsak, ostonadan uyni to'rigacha kiyimlari va boshqa narsalarining sochilib yotganiga guvoh bo'lamiz. Ertalab ishga ketish oldidan baqir-chaqir bilan paypoq izlash boshlanadi. Nima uchun farzandimizning kiyim-kechagini onasi yoki ayoli yig'ishtirib yurishi kerak? Nega ishlatgan buyumlarini yuvib, tozalab joyiga qo'yilmaydi? Nega bolamiz ishlatgan birgina tokqaychini soatlab izlab, jig'ibiyron bo'lamiz? Bu noxush holatlarning sababi bolamizga yoshligidan mas'uliyatni anglashni o'rgatmaganimizdir.

Rivojlangan mamlakatlarning barchasida, jumladan, bizda ham bolalar 3 yoshdan bog'chaga borishadi. Bog'cha opa bolaga kiyimlarini tegishli joyga, talab etilgan tarzda joylashtirishni o'rgatadi va bolalar uni bajarishadi. O'sha bola uyga kelgach, ostonadan boshlab oyoq kiyimini yarim yechib otadi. Kiyimi ham shu alfozda yechiladi va kattalar ularni yig'ishtirib oladi. Kattalar buni tabiiy holdek qabul qilishadi, natijada bolalar o'z vazifasiga mas'uliyatsiz bo'lib o'sadi.

Yapon ona bog'cha opa bilan hamkorlikda ishlaydi. Bog'chadan uyga kelgan yapon bolasi kiyimlarini, poyabzallarini va boshqa buyumlarini tozalab, joy-joyiga qo'ygach, ikki kaftini birlashtirib, ta'zim bilan bajaran yaxshi ishlarni uchun atrofida kattalardan rag'bat kutadi va uni abtala, oladi.

Shu o'rinda o'zimizda bo'lgan hayotiy voqeani keltiramiz. Bir oilaning 5 va 7 yoshli o'g'illari hovlida to's-to'polon qila boshlabdi.



Bolalarning shovqin-suronidan bezor bo'lgan amakisi ularni ichkariga kiritib yuboribdi. Yotoqxonani yig'ishtirayotgan ona zaldagi bolalarining "Kattalarni boyladik-a", degan gapini eshitib qolibdi. E'tibor qilsak, yapon bolasi qilgan yaxshi amallari uchun kattalardan rag'bat olib xursand bo'lsa, biznikilar kattalarni "boplab" quvonishmoqda. Bolalarga o'z vaqtida to'g'ri tarbiya berilmasa, kelajakda "boplovchi"lar nimalar qilishmaydi.

Yapon onasi 4 yoshli farzandiga uning hayotida uchrashi mumkin bo'lgan yaxshilik bilan yovuzlikni farqlashga o'rgatadi. Yapon oilasi bog'cha bilan hamkorlikda 5 yoshli bolalarda liderlikka, reja tuzish va ularni mustaqil bajarishga o'rgatishadi. Bog'chada 8 kishilik kichik guruhlardagi bolalar navbat bilan rahbarlik vazifasini bajarishadi. Bu amallar maktabning boshlang'ich sinflarida ham davom ettiriladi.

Xullas, Yaponiyada oila, bog'cha va maktab ta'lim-tarbiyasida uzviylik o'rnatilgan. Biz ta'lim-tarbiya sohasida xorijning ilg'or tajribalaridan foydalansak, o'rinni bo'ladi. Chunki butun jahon barcha sohalarida, jumladan, ta'lim-tarbiyada ham o'zaro manfaatli munosabatlarga asoslanadi.

Pirnazar DAVRONOV,
viloyat pedagoglari yangi metodikalarga o'rgatish milliy markazi professori.

Mulohaza uchun mavzu

Ko'ngilga "kamera" o'rnatish kerak

Ayrim korxonalar va tashkilot, hovli yoki ko'p qavatli uylarning yonidan o'tsangiz gul va manzarali daraxtlar ekilganiga guvoh bo'lib, bahri diilingiz ochiladi. Ba'zi turarjoylar atrofi esa chiqindi bilan to'lgan.



Kech kuz edi. Xizmat safari bilan chekka tumanlarning birida bo'ldim. Ilgari ham bu yerda bo'lganman, ammo markaziy ko'chalarda, avtomobil yo'li va piyodalar yo'lakchalari orasidagi bo'sh joylarning qurib, changib yotganini ko'rdim. Bu safar boshqacha manzaraga ko'zim tushdi. Yo'l yoqalari ko'kal-lamzorlashtirilgan, gulzorlarga aylantirilgan. Hayratlanganimni hamrohim - tuman hokimligi axborot xizmati rahbaridan yashirmadim.

Bunga erishish oson bo'lmadi, dedi u. - Yaqinda ish boshlagan hokim o'rinbosarining sa'y-harakati bilan shu natijaga erishdik. To'g'risini aytisam, odamlarni yaxshi gap bilan "uyg'otib" bo'lmadi. Ishchi guruh tuzilib, har bir tashkilot bormi, korxonami, savdo do'konimi, barchasini ko'zdan kechirdik. Har biriga o'ziga tegishli hududni obod qilish tavsiya etildi. Ishlar haftada bir martadan nazorat qilinadigan bo'ldi. Videolavhalar tayyorlanib, har yig'ilishda muhokama qilindi. Yaxshilari maqtaldi, "uyqudagi"lari tanqid qilindi. Xullas, ikki oyda iziga tushdi. Endi odamlarimiz bu ishlarni odatga aylantirsa, ko'chalimiz har doim ko'rkam bo'ladi.

Shu kuni "Tomorqadan topganlarim" rukni ostida maqola tayyorlash maqsadida tumandagi ayrim hovllarda ham bo'ldik. Ularning birida yashovchi Tolliboy amaki 3 sotixgina tomorqasidan mo'may daromad topayotganini aytdi. Yana bir tomorqa egasi,

o'zini Gulsum deb tanishtirgan onaxon yoshi yetmishga yaqinlashib qolgan bo'lsa-da, 2 sotix maydonda gul ko'chatlari yetishtirib sotish bilan shug'ullanar ekan. U hovlisidan tashqaridagi ariq yoqasidan ham unumli foydalanyapti. Bu yerda ochilib turgan gullar, birinchidan, ko'chaga ko'rkamlik bag'ishlansa, ikkinchidan, ular orasidan ko'chatlar olinib, bozorga chiqarilishi onaxonning oilasiga qo'shimcha daromad keltiryapti.

Ayrim keng maydonli tomorqalarning aksariyati esa bo'sh yotibdi. Achinarlisi, bu hovllarda Gulsum aya va Tolliboy amakidek nuroniylar emas, yosh-yosh yigitlar yashaydi. Aynan ana shu kabi hovllarning atrofi obod qilinmagan.

Yana bir misol, shahar markazidagi ko'p qavatli uylarning biri yaqinidagi ayvonchaga o'rnatilgan o'rindiqa do'stimni kutib o'tirgandim. Atrofnig tozaligi e'tiborimni tortdi. Odatda kutish odami charchatadi. Ammo bu hududning obodligi va sokinligi menga zavq bag'ishlardi.

Birozdan so'ng ichida allanimlardir bo'lgan qora polietilen paketning yuqori qavatdan yerga tushishi va bu holatga guvoh bo'lgan, sal naridagi o'rindiqda o'tirgan ayolning baqirgani oromimni buzdi. Ayolning atrofida darrov bir necha kishi to'plandi.

- Qaranglar, bu nima ahvol? - dedi ularga maysalar ustida sochilib yotgan chiqindilarni ko'rsatib. - Bir bo'lmadi, ikki

bo'lmadi... Axir bu yerni obod qilish uchun qo'shnilarning hech biridan bir tiyin tilmagan-da. Manavi birinchi qavatda yashaydigan Asqar amaki bir o'zi qildi shu gulzorni. Birov yordam beray demadi. U kishi ishlayotganda "hormang" deb o'tishga yaramadi ayrimlari. Otasi qatori odamning mehnatini qadrlash o'rniga chiqindi uloqtiradi.

- Ha, yana shu yuqori qavatda yashaydiganlarning ayrimlari balkonidan pastga nos tuflaydi, befarosatlar, - deya jahl bilan baqira ketdi boshqa bir ayol.

- Kamera qo'yish kerak, - dedi ularni jimgina tinglab turgan erkaklarning biri.

- Kamerani har bir inson o'zining ko'ngliga o'rnatmasa, natijaga erishib bo'lmaydi, - suhatbatga qo'shildi yana bir erkak kishi.

- Har kim nima ish qilayotganini birovning ko'zi bilan ko'rib turishi kerak va o'ziga o'zi baho berishni o'rganishi shart. Aks holda, ana shunday hayot kechiraveramiz. Agar odamning aqli yetmasa, kameraning ustiga ham tuflab ketaveradi. Jarimalar ham uning ko'zini ochmasligi mumkin.

Har birimiz farzandlarimizning kelajagi uchun qayg'uramiz. Ularning sog'lom bo'lishi tabiatning musaffoligiga bog'liq ekanligini chuqurroq anglab yetishimiz kerak. Ko'chalarni ko'kalamzorlashtirish, gul va daraxt ko'chatlarini parvarishlash o'rniga chiqindi uloqtirishimiz iqlimning o'zgarishiga sabab bo'lyapti.

To'liqin SIDDIQOV.

SHU OYDA TAVALLUD TOPGANLAR

19-APREL

Zafar ISMOILOV - 1955-yilda Samarqand shahrida tug'ilgan. Biologiya fanlari doktori.

20-APREL

Primqul NURMONOV - (1911-1978) Payariq tumanida tug'ilgan. Ikkinchi jahon urushi qatnashchisi. Qahramon.

Jamol TURSUNOV - (1951-2001) Oqdaryo tumanida tug'ilgan. O'zbekiston Jurnalistlari ijodiy uyushmasi a'zosi.

Ahad HAYDAROV - (1911-1971) Samarqand shahrida tug'ilgan. Jarroh. O'zbekistonda xizmat ko'rsatgan fan arbobi.

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 12 680 nusxada chop etildi. Buyurtma 197. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da.

Bosishga topshirildi: soat 19:00

Navbatchi muharrir:

G.HASANOV.

Navbatchi:

G.MO'MINOVA.

Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



9 1772010667009

Sotuvda narxi kelishilgan holda